

牧


齋

初

學

集

牧齋初學集卷第四十二



記三

重修素心堂記

吳江張益之先生余之先友也余兒時聞諸先夫子益之世居越來溪其父靜孝先生爲堂於溪上名之曰素心堂構堅好喬木翳然其傍有僞吳張士信廳事益之家中落堂已更主語罷輒爲憮然崇禎六年余訪益之之子孟舒于溪上登其堂卽所謂素心者孟舒已復而居之加塗墍焉問士信之廳事老屋歸然負扆猶在相

與緩步絮語感先夫子之游跡慨然太息不忍
去越翼日之無錫過華學士東亭故宅俗所推
甲第者前堂軒敞壯麗吞若素心者八九於其
胸中其樸雅閒靚殆弗如也飛樓突厦層臺砥
室網戶刻桷所在而是然赤白漫漶板腐而軌
缺亦閒有之不若越溪之居完且美也又爲之
慨然太息以爲奉誠之園平泉之莊唐人所俛
仰咏嘆不可勝紀王侯卿相百年之後裔孫克
守舊第若魏國之永興坊者蓋亦罕矣魯人美
僖公之復宇晉臣頌文子之成室張氏之有孟

舒豈非誠賢子孫而經史之所亟稱也與閒以
語異度異度曰噫吾兄之復是也則難矣吾兄
頻年以來身無兼衣食不重味匪朝伊夕拮据
捋荼者爲此堂也修祖墓刊家集收族而洽親
者爲此堂也修身矯思刑妻孥化僮僕薰鄉里
而善良所以居此堂也吾兄年七十矣以先人
之故徼惠于吾子記此堂之復以代生辰爲壽
之詞不亦可乎余曰善遂書之而余方營先墓
於拂水築丙舍墓之西徧美是堂之制命工圖
以來視其棟宇而構焉他日堂成亦將屬異度

爲之記崇禎九年正月記

頤志堂記

河南陸羣圭氏家於虞山之下傍山臨池爲堂以讀書其中名之曰頤志取其家士衡之賦所謂佇中區以玄覽頤情志於典墳也堂旣成而橫經籍書俯仰誦讀者蓋有年矣今年謁余而請使記其名堂之意夫斯堂也以讀書而名也讀書之法無他要以考信古人箴砭俗學而已進學解韓退之所讀之書也答帚中立書柳子厚所讀之書也古之學者自童丱之始十三經

之文畫以歲月期于默記又推之於遷固范曄
之書基本既立而後徧觀歷代之史參于秦漢
以來之子書古今譔定之集錄猶舟之有舵而
後可以涉川也猶稱之有衡而後可以辨物也
今之學者陳腐于理學膚陋于應舉汨沒錮蔽
于近代之漢文唐詩當古學三變之後茫然不
知經經緯史之學何處下手繇是而之焉譬之
駕無舵之舟以適大海挾無衡之稱以游五都
求其利涉而稱平也不已難乎俗學之敝莫甚
於今日須溪之點定卓吾之刪割使人傭耳剝

目不見古書之大全三十年於此矣至於今聞人霸儒敢於執丹鉛之筆詆訶聖賢擊排經傳儼然以通經學古自命學者如中風狂走靡然而從之嗟乎胥天下而不通經不學古病雖劇猶可以藥石攻也胥天下而自命通經學古如今人之爲其病爲狂易喪心和扁望而却走矣楊子不云乎人各是其所是而非其所非將誰使正之陸子之嗜學若是其專且勤也亦思其所以正之而已矣經經而緯史繇韓柳所讀之書以進於古人俾後之學者涉焉而以爲舵稱

焉而以爲衡名堂之意庶有當乎余雖老而失學他日猶能負書挾冊登斯堂而問焉姑書是言以先之崇禎九年正月記

蓼菴記

太倉曹子忍生痛其父母之蚤世而不及養也又自傷其長而不遇無以慰其親於地下也讀詩至蓼莪輒爲廢書泣下文宮洸文起大書蓼菴二字以貽之曹子顏于其讀書之屋而請余爲之記吾聞諸夫子孝始於事親中於事君終於立身此卿大夫與士之孝而人子之所當有

事也若夫蓼莪之孝子致恨於失養而以爲鮮
民之生不如死此所謂庶人之孝也曹子宜何
居焉蓼莪之詩說詩者以爲刺幽王也其詩蓋
麗於谷風之什而北山之獨賢小明之悔仕怨
嗟竝作蓋莫甚于此時今聖天子在上惟皇
建極陰陽和而萬物理鹿鳴以下之詩竝興而
南陔白華亦皆比笙歌而奏於堂下居今之世
而悲憂窮蹇退而稱蓼莪之詩吾竊悲曹子之
志而惜其不遇也雖然曹子則可謂孝矣古之
人戒其君求賢而用吉士必曰有孝有德又曰

如圭如璋令聞令望宣王之在內者推張仲孝友而蕭望之謂張敞材輕非師傅之器亦此志也曹子志氣卓犖議論天下事滾滾如貫珠顧其夙夜刻勵有終身之慕若此其將進而爲珪璋孝德之士奮庸於休明之世以矢來游來歌之盛事乎吾知其不徒爲蓼莪之孝子而足也聊書之以廣曹子之意崇禎四年六月記

聊且園記

侍御萊蕪李君雍時謁余而請曰余爲園于城之北隅其中亭之曰可以槐栢翳如花竹分列

鑿沼矢魚蹲石陰松此余之所爰也其東亭之
曰學稼植以黎棗雜以柿杏亭之後除地築場
誅茅爲屋溝塍迂錯鷄犬識路此余之所作勞
也其西亭之曰學圃樹桑成陰蔬得以避暵渫
井爲池土得以滋墳榮木周遭瓜果狼籍此余
之所食也折而南其中有齋曰則喜夾窻助明
琴書楮柱余之所抱膝而深居也梅樹盤紆編
爲虎落叢生蔓延香霧雜遘樹之眉曰梅花深
處東樹桃李西樹杏交亞蔽虧爲梅外藩以明
余之比于梅也其北則老樹攬挈茂林晻靄三

徑未絕窅如深山又折而西北地勢忽瀉清池
呀然長林覆之若眉著面桃李緣堤蓮藕盈池
無時不花靡夕不月余之所行吟而觴咏也合
而名之曰聊且園子其爲我記之余惟侍御荷
橐簪筆供奉赤墀今且巡行雲中上谷閒宣威
種落一丘一壑豈其所有事乎東夷不靖浹辰
而克我河東士大夫之辱不止于四郊之多壘
也又何燕游之足云乎侍御之名園曰聊且聊
且之爲言苟然而已之辭也今之苟然者多矣
苟然于廟堂而國論壞苟然于疆圉而戎索壞

侍御之所謂苟然者園亭燕游之事而已其所
告誡于世者不已多乎若以附于止足之義如
公子荆所云其於聊且之云固不相背要亦所
謂同枕而異夢者何足以發侍御之指哉侍御
僂力王家爲天子復河東故地正佟夷之誅使
吾輩得握三寸管爲太平之幸人他日幅巾杖
屨訪侍御東海之濱坐斯園而訪陳跡以余知
言者也其樂爲何如天啓元年四月初五日記

保硯齋記

保硯齋者戈子莊樂奉其先人文甫所藏唐式

端研以詒其子橐而以名其齋也戈子攜其子過余山中薰沐肅拜而請爲之記夫天下之物人苟愛而翫之未有不思詒其子孫者也金谷之池臺平泉之花木集古之金石悅生之書畫彝鼎非王公大人不能有非世爲王公大人不能守也若夫硯則蓴門竹屋可以藏棄也破窻損几可以鋪陳也韋布之儒生兔園之書冊可以爲伴侶也匹夫孺子可懷褰而藏也可提挈而走也是故天下翫好之物多不能傳之再世而保硯爲易雖然硯之爲用大矣九經之文字

出焉天地之情物生焉傭工記名姓小儒箋蟲
魚其于硯也猶無與也貪夫用以把算子酷吏
用以書獄辭或媚權而飛章或乞哀而書表其
爲硯之辱終古不能浣也必也窮經而好古澡
身而洗心以磨礪比德焉以介石比貞焉其不
爲硯辱也斯爲能保硯者乎是故凡翫好之物
易于保有而保硯爲尤難戈子之以保硯名齊
也其將保其易者乎抑將保其難者乎文甫之
父子安貧矯志不失素風其能保斯硯以詒後
人也亦必有道矣吾邑繆侃仲素嘗得述古圓

硯旁刻西園雅集圖出宋元章李伯麟之手遂以述古名其堂而黃文獻公爲之記迄今三百餘年仲素之硯未知猶在人閒否而其堂之遺址亦無從問諸荒煙野草之閒獨文獻之文在耳繇此言之保斯硯以詒子孫固不若求所以保斯硯者之爲可久也戈子以此勗其子可矣遂書之以爲記崇禎庚辰中秋記

嘗熟縣教諭武進白君遺愛記

古之學者必有師承顓門服習繇經術以達于世務畫丘溝涂各有所指授而不亂自漢唐以

降莫不皆然勝國之季淝河東有三大儒曰黃
文獻潛柳待制貫吳山長萊以其學授于金華
宋文獻公以故金華之學閤中肆外獨盛于國
初金華旣沒勝國儒者之學遂無傳焉嘉靖中
荆川唐先生起于毘陵旁搜遠紹其書滿家自
經史古今以至于禮樂兵刑陰陽律曆勾股測
望無所不貫穿荆川之指要雖與金華稍異其
講求實學繇經術以達于世務則一也世之爲
科舉進士之業者以帖括誦法荆川爲應舉之
資而已而鈎章棘句之徒又從而訾警之荆川

之集已束之高閣不觀而況荆川以上者乎勝國諸君子且不能舉其氏名又況于師友淵源之際乎教學相沿張張然徒以苟且尺寸豪末爲意而古聖賢之書帝王之制度欲其先著于胸中如虞文靖之所稱于蜀學者其可幾乎自余里居以來士友之下問者未嘗不諄復告之而俗學之蠱晦已久余之力固不足以表襮墜緒障百川而東之也萬曆癸丑毘陵白君紹光以進士乙榜署嘗熟學教諭疏穢訂頑緝文厲行立五經社分曹課試四方名士翕然來從君

與禮部侍郎孫公皆荆川先生之外孫流風遺
書浸漬演迤入學鼓篋一皆舉荆川之學而措
之故其學安而道尊粲然有文如此也君既擢
興安縣知縣諸弟子員件繫其學政相率踵門
願刻文于石以示遠久余惟白君之師道立矣
諸弟子之親其師也可謂勞矣雖然先王之祭
川先河而後海稱人之善未有不本其父師者
也鄉人士之淑艾于白君者皆荆川之遺也其
可以無述乎因白君之教而推本荆川之學或
源或委發其遺書而讀之其人猶可作也自勝

國以沂漢唐其師承指授如捧手而相詔也夫如是則吾鄉之士必有滌訓詁辭聲之陋出而有聞于當世者而白君之教衣被于是邦者豈有既乎記有之善歌者使人繼其聲善教者使人繼其志夫推本荆川之學以教邑之子弟白君之志也余爲斯記陷置壁間鄉人士來游來觀因余之言開發頭角庶有以繼白君之志而衍其教思也哉己未正月廿八日記

儀孟劉母銘旌記

萬曆四十五年六月劉母王氏夫人卒于其子

永基宜興之官寢宜興之民三日哭罷市其大夫士聚而銘其旌曰儀孟劉母之柩按禮爲銘各以其物書曰某氏某之柩男子稱名婦人書姓與伯仲稱儀孟劉母者何別劉母也明旌之有銘也以死者爲不可別而以其旗識之識之者別之也稱儀孟以別劉母古之道也劉母之爲儀孟柰何劉母之爲婦也劉氏家中圯母女事絕巧紉箴所出上奉尊章外應賓客下庀二叔履綦若指困廩總絢暴練兼屨人染人之能嘗手自漚帛力瘳甕澤器旁移時乃甦猶強起

事揮盞也宗人鄉老咸曰精五節舉酒漿縫衣裳孟母之教也是善爲人婦劉母之爲母也告夫子曰孺子長矣盍令負笈出遊踐桑弧蓬矢之志乎跪塙于庭具羞服而遣之已遣永基如塙已又遣垸如永基三子者遂皆以尊師取友有聞望于時塙游燕母命之曰男子墮地有師女子獨無師女道嶧山爲我奠棗修于孟母所以志也塙謁孟子廟見石刻畫像長跪母前大慟而起爲文以記其事四方之人咸曰學以成名問則廣知孟母之志也是善爲人母永基舉

進士知嘗州之宜興縣母居官寢告戒廉媵禁
詔呼歎鳴於柵中永基出捕蝗母宿治殖膊旬
日而後反門闔封識宛然官舍有二桑繅絲得
十餘兩喜謂家人曰今歲幸不以授衣累宜興
矣卒之日民巷哭者如喪考妣而大夫士遂以
其旌銘之君子以爲允蓋徵諸劉母之爲人婦
爲人母者而又原本其所以師事孟母之意沒
身而已者也故曰稱儀孟劉母者別劉母也雖
然有是母斯有是子矣孟母之爲母師視公父
文伯田稷子之母加著焉以孟子爲之子也別

劉母者亦以別劉母之子也置銘于重于律士喪禮之僅存者也可以觀禮焉婦人無謚然大夫士羣聚而銘有審謚于朝之義焉數其銘辭六言而已既別其母又以別其子志而婉微而昭有春秋之遺法焉謙益未第時與塙永基定交二子者之與謙益友也歸以告于其母謙益習知母儀法聞銘旌之舉考于大夫士之辭以爲其可以傳也遂刻石而爲之記

天台泐法師靈異記

天台泐法師者何慈月宮陳夫人也夫人而泐

師者何夫人陳氏之女歿墮鬼神道不昧宿因以台事示現而馮於卜以告也卜之言曰余吳門飲馬里陳氏女也年十七從母之橫塘橋上有紫衫紗帽者執如意以招之歸而病卒泰昌改元庚申之臘也其歸神之地曰上方侯曰永寧宮曰慈月其職司則總理東南諸路如古節鎮病則以藥鬼則以符祈年逐厲懺罪度冥則以箋以表以天啓丁卯五月降於金氏之卜今年矣問其宿因則曰故天台之弟子智朗墮女人身生於王宮以業緣故轉墮神道以神道

故得通宿命再受本師記荊俾以鬼神身說法也問本師記荊云何則曰大師以宿昔因緣親降慈月宮爲諸神設法吳人尚鬼好殺故現鬼道救殺業善巧方便漸次接引歸於台事而已其示現以十二年爲期後四年而大顯時節因緣皆大師所指授也卜所馮者金生采相與信受奉行者戴生顧生魏生皆於台有宿因者也或問於錢子曰慈月之事子以爲信乎誣乎余曰信也如來拳拳付囑惟此正法正法衰熄魔外盛行未有甚於此時者也當此時闡揚台事

大明如來一期教之局鐫譬則破昏夜以月燈
開盲人以眼目諸佛菩薩所共護念証明誰得
而非之今之禪病深矣魔民登師子之坐廝養
踞大慧之席盲拳瞎棒欺天罔人信法門之師
子蟲也慈月以人天眼具正知見汲汲然以教
藥療禪病人知其闡教者所以顯教而不知其
療禪者正所以護禪也菩薩於疾病世作大醫
王慈月示現亦復如是我輩生人道中不能護
持末法而以聽於鬼神將慚愧讚嘆之不暇而
矧有後言耶至其妙達三乘博通外典微詞奧

義盡般若之笙簧綺句名章總伽陀之鼓吹紫微右英諸真與楊許相訓問者猶不敢窺其藩落而況神君紫姑之流乎故曰信也或曰爲台事示現是矣其兼言禍福柰何曰師固言之矣每見山林塚廟邪祀鬼神厭人血肉心竊痛恨故多以符方療疾冥冊之中殺業第一故黽勉相勸也今因病之驗而漸且求財求子求壽求功名以一神之力而敢侵朝廷之權何不理之尤也夫慈月所急者台事也而世人所急者貪生畏死與榮名富厚也兩相急而兩相求不得

不聊且應之故曰先以欲鉤牽後令入佛智今
慈月急世人之所急而世人不求慈月之所求
求而不相得則怨與謗從之矣衆生在五濁世
中三毒競興十纏爭發以慈月之慈而不能供
其求也雖千佛出世其求彌甚以慈月之慈而
不能弭其謗也雖千佛出世其謗彌甚雖慈月
其若之何哉或曰朗爲天台高足弟子末後親
受囑累何以墮落乃爾曰師資云逝善友淪亡
判那遷謝豈能自保無始以來惡業纏蓋放逸
比丘墮牛豬狗猴各五百身憍梵鉢提已得阿

羅漢道反作牛齡而何疑於朗耶自女人身轉落鬼道如離弦之箭彌去彌遠然在鬼道中得知宿命展轉牽率不昧宿因所謂如塞翁失馬是也亦以戒力熏習善緣純熟譬如蹴踘著地旋起佛言出家人雖破戒墮罪罪畢解脫如優鉢羅華以慈月之事觀之則知多生戒力如鎔金入泥終不銷亡久而益瑩既可以爲退墮鞭後亦可以爲勇猛策進者也或曰淫昏之鬼不在祀典慈月之歸神於此奈何曰鬼神之受報不同其有威德者或住山谷或住空中各有宮

殿冠華鬢著天衣食甘美形容端正無異諸天
上方之神殆所謂有威德者也其生前必有利
益於生人貪姪著業受此福報不知以何因緣
因依慈月與被法力此其宿因亦不薄矣安得
以世眼量之獄神之受戒閻羅之聽講歸依正
法載在傳記四生六道皆可修行天龍夜叉竝
護佛法何獨於鬼神而斬之乎菩薩以願力故
天龍鬼神等及諸外道邪見悉生其中爲其導
首廣爲宣化慈月之墮鬼道安知非乘宿昔願
力生趣異類調伏衆生卽鬼神中亦豈無以權

方便留惑示現者則鬼神之身爲業報爲應化
且未可臆斷而況於慈月乎或曰智者之入滅
久矣慈月之說法將使誰證之曰佛以大衣付
大迦葉以無上法付大阿羅漢皆不令滅度也
大師滅後六降山寺一還佛壘振錫披衣有如
平日以往時案行安隱之言較今日付囑流通
之旨嘗寂光中如屈伸臂耳子能知一心三觀
之義則十身佛刹微塵數修多羅如懸帝網尚
何疑於慈月之今昔與大師之去住哉叶告我
曰明公爲我作傳以耀於世亦道人習氣未除

也余曰唯唯作天台泐法師靈異記

岳忠武王畫像記

里中蕭生故觀察公之諸孫也嘗夢之武林拜
宋太師鄂國忠武王廟下王延入坐而語之曰
邊事旁午不遑啓處吾比年有事北方甫歸又
趣駕去矣顧視其左右介士嚴裝將發金戈鐵
馬縱鐙作聲渙然流汗而覺崇禎改元之十二
月也越一年而有遵化之事生占斯夢以爲信
而有徵命畫工繪王像夙夜齎盟事之而屬余
記其事自昔言夢者皆本于周官之六夢生之

夢何居曰是所謂正夢也寧錦解圍以來羣酋
竄伏舉世之人皆置似于度外生何思焉又何
寤焉筐篋几席之間噩而夢喜且懼而夢于王
事乎何有故曰正夢也 聖朝役使百靈羣神
羣祀名山大川靡不爲天子守護社稷訶禁不
祥獨王有事焉者何曰惟忠武王僉力中夏誓
滅金虜佟奴以王果餘孽冒金源之後啓疆犯
順忠武有靈其能貫諸左雲而右憲陣背鬼而
刃麻扎生不克直擣黃龍飲匈奴之血沒而佐
佑 聖朝刊羣酋爲膾脯俾無遺種不惟陰敵

我王愾王亦可以逞厥志焉王之有事于北方者此也日者蘆溝之役戕我大帥殲我全師去都城僅三舍耳我不發一矢奴逡巡顧視銜尾引去雖聖天子威靈燁赫蓋亦鬼神相助之力焉今之游魂餘息出沒遵永閒安知非王陽施陰闔假之條鏃而制其死命耶然則斯夢也何以獨告于生詩不云乎牧人乃夢曹人之夢衆君子謀曹也非有列于朝者也周官占夢季冬聘王夢及其獻吉夢于王王拜而受之生之夢可謂吉矣盍齋祓走三千里以斯夢獻于

天子 天子將訊諸宗伯舉周官拜受之典余
亦宗伯之屬也記其事以徵焉

牧齋初學集卷第四十三

牧齋初學集卷第四十四

記四

重修維揚書院記

維揚有書院作爲講堂學舍延道德博聞之儒
樞衣升堂昌明孔孟之道而鄉人子弟相與羣
萃州處以爲講肄之地其來舊矣萬曆中御史
中州彭君來視鹽政閱其蕪廢修而作之祀董
仲舒以後諸賢于其中高館會樓宏壯靚深故
御史大夫鄒忠介公爲之記久之復廢後鹽使
者秦和楊君愾然歎曰豈可使講德之堂夷而

爲長亭廚傳乎按其舊而新之正其名曰維揚
書院以書屬余曰願有記以繼忠介之後日者
講學之禁嘗嚴矣蓋發作于萬曆之中而浸淫
于天啓之後迨于今講者熄禁者亦弛胥天下
不復知道學爲何事夫其禁之嚴也鈞黨促數
文網鏘急猶足以聳剔天下精悍之氣而作其
隕阨是故逆奄之禍士大夫捐身命以扞之而
士氣卒以勝及其禁之弛也天下皆鐫夷其廉
隅吮嚙其頰舌頑鈍狂易懵然於森庑脂夜之
中于是朝著無槃水加劒之大臣疆場多扣頭

屈膝之大吏集詬成風而刑辟不足以禁禦繇此言之禁學之效可見于此矣自正心誠意之學陳陳相因而姚江良知之宗始盛儒者又或反唇而譏之良知之言昉于孟子孟子曰無惻隱之心非人也無羞惡之心非人也無辭讓之心非人也無是非之心非人也分而言之曰仁義禮智其實則良知而已矣夫立乎人之本朝蠅營狗苟欺君而賣國者謀人之軍師國邑偷生事賊迎降而勸進者惻隱羞惡辭讓是非之心蓋已澌然不可復識矣其良知之未死者如月

之有魄也如木之有枿也質諸夢寐告諸妻子
未有不渙然汗下煩冤歔歔者也故曰噤爾而
與之行道之人不受蹴爾而與之乞人不屑也
行道乞人之所不受不屑而公卿大夫交臂而
仍之恬不爲怪彼亦遏抑其良知抹殺其廉恥
違心反面以至此極也誠使良知之學講之有
素知如是而爲人如是而非人也知如是而爲
忠臣孝子如是而亂臣賊子也知如是而爲聖
賢如是而夷狄禽獸也知湯之必灼也必不赴
知火之必焚也必不蹈知塗炭之必焦爛也必

不坐如是而士氣可立國恥可振森鹿脂夜之
祥其可以少解矣乎稽良知之弊者曰泰州之
後流而爲狂子爲僂民所謂狂子僂民者顏山
農何心隱李卓吾之流也彼其人皆脫屣身世
芥視權倖其肯蠅營狗苟欺君而賣國乎其肯
偷生事賊迎降而勸進乎講良知之學者公而
下之則爲狂子爲僂民激而返之則爲忠臣爲
義士視世之公卿大夫交臂相仍違心而反面
者其不可同年而語亦已明矣嗚呼聖人之言
元氣也孟子之言藥石也姚江之言救病之急

劑也南宋之世以正心誠意藥之而不效故有
風痺不知痛癢之證今之世以惻隱羞惡辭讓
是非藥之而不效故有頑鈍狂易之證舍是而
不加診治則人心死矣病在膏肓不可以復活
矣用良知之學爲急劑號呼惕厲庶幾其有瘳
乎楊君今之有志于醫國者也當軍興倥傯征
求旁午之會捨鹽鐵之策而修師儒講肄之事
其必以爲救世之務莫先于此與誠先之則請
自姚江之學始鄒忠介公者余之執友而楊君
之鄉先生也天啓之學禁以忠介爲首忠介之

記蓋亟稱姚江泰州而楊君之所得于忠介者深矣故樂爲記之使刻石陷諸壁間亦以告于維揚之士繼泰州而興起者也崇禎十六年十二月初四日嘗熟錢謙益記

長洲鄭氏新復祭田記

惟鄭氏遠有條序國初國子監助教士龍斷自有宋建祠立主曰狀元毅夫公獬學士忠惠公性之丞相忠定公清之提舉文臺公天錫高士所南公思肖割膏腴以供祀視圭田而三之三傳爲處士德躋助教于廡子孫以昭穆祔祭田

倍助教而三之自助教下五支分守其祀郡縣
有牒祠有碑田有圖餘百年矣其割而畀之他
族也自萬曆十二年始鄭之宗人顧視廬冢哭
而相吊又餘五十年矣訟而贖之按碑以崇祀
歸餘以息爭自崇禎十六年始于是鄭之雋孝
廉敷教以書來請曰願有記昔者鄭請釋泰山
之祀以祀周公春秋諱之書曰以璧假許田僖
公復許田閼宮作頌曰居常與許復周公之宇
鄭氏之舉於是乎近閼宮矣古者君子雖貧不
粥祭器雖寒不衣祭服爲宮室不斬乎丘木大

夫士去國祭器不踰竟其去而止之大夫曰柰何去宗廟也士曰柰何去墳墓也知祭器不粥墳墓不去之義則天子諸侯以至于公卿大夫其所當守而勿去者可知已矣故曰國君死社稷大夫死衆士死制又曰謀人之軍師敗則死之謀人之國邑敗則亡之今也楚豫之間寇未至而先潰名都大邑棄之如遺跡焉向令能如鄭氏之子孫所以營祠復田死守勿替者其肯弁髦職守而以都邑與人乎嗚呼述祖德崇先祀可以教孝嚴守祧時饗祀可以觀禮食舊德

服先疇可以作忠使天下士大夫衆著于復田之義視朝廷之軍師國邑咸如祭器之不可粥墳墓之不可去則祖宗之土宇版章可復而流亡潰敗之禍其少止乎田之復鄭氏一家之事可以無書而復田於今日當名都大邑棄師失守恬不知戒之時其亦以有警也不可以不書乃爲之書是年崇禎十六年癸未也

虎丘雲巖寺重修大殿記

崇禎二年十一月虎丘雲巖寺災大雄寶殿萬佛閣觀音閣方丈樓觀一夕而燬山林焦枯神

鬼灼爛人天憐悽如聞歎噫寺僧持簿勸募垂
十年高門縣簿靡有應者東陽張公奉天子
命保釐是邦慨然嘆曰噫是誠在我捐俸錢搜
鍤金僚屬咸欣助焉乃屬山僧鳩材庀徒量工
命日自十一年四月初八日始事至十三年四
月初八日大殿卒功方丈樓觀以次修葺邦人士
女來游來觀耄艾詠歌推美頌考於是僧以公
之命來請曰願有記也或曰昔稱虎丘奠吳西
門西金方也闔廬之葬也湏池六尺扁諸之劍
三千葬三日而白虎蹲其上金之精也寺災之

夕金昌望齊坊市水銀匝地金氣發矣公于是
作斯殿以鎮之有厭勝之道焉天下盜賊鋒起
兵火彌亘中吳一隅宵柝不警公之爲吳人違
兵也此非其微與或又曰張魏公當紹興時記
虎丘經藏以謂夷狄之變其來有自欲愛貪念
是謂無明展轉交攻激爲鬪亂我佛以清淨立
教使回心歸善和氣自生公方親臨戎馬鏖劇
賊于京江桐皖之間顧汲汲爲此舉也表佛力
迎和氣彌三災消劫火其機緣深矣其願力偉
矣公固張姓也寧非魏公再來現身說法者歟

嗚呼頻年以來水旱刀兵雜然交作疵癘夭扎
民不堪命方鎮大臣囊金積帛郵傳拜除視之
蔑如也自公之來敷和布德宣慈訓廉耆老病
瘥燠肌起羸器童鰥孤咸登衽席今茲之役一
錢寸布不煩公私朝薨暮鹽節縮僦工斯殿之
落成也邦人之歡心頌聲與丹樓絳殿互相涌
現于諸天雲物之中故能化兵氣爲祥雲轉災
土爲佛國然則考公保釐之績著于東南者莫
如是役宜也公撫吳七年宣勞治河入爲本兵
以疆事牽連就徵吳之人扶杖負襁炷香撮土

匍匐佛前告哀祈宥若叫閭闔若投匭函此尤可書也余故不辭而爲之記其不特以記其成亦以使後之有官君子有事于崇佛者於張公之爲宜有考也崇禎十六年十二月嘗熟錢謙益記

萊陽姜氏一門忠孝記

崇禎十六年三月行人司行人臣垓伏闕上疏言去年閏十一月奴酋兵掠萊陽臣父勅封儀真縣知縣姜瀉里山居聞警率子弟僮奴入城死守二月初六日奴突至城陷巷戰被執奴就

索金帛臣父罵曰吾二十年老書生二子爲清白吏安得有金帛飽狗奴腹以馬捶捶之嚼齒大罵奴攢刃刺之乃死臣季弟姜坡偕侍郎宋玫守東城趨抱父屍慟哭奴縛置寨中夜舉火燒奴帳奴覺嚮殺之臣母及長兄圻負重傷圻妻王氏臣妻孫氏坡妻左氏及次姊先後投繯赴火死臣兄禮科給事中琛言事迂戇荷聖明寬宥頌繫西曹聞計浹旬號慟絕食臣若奔赴故里則臣兄園扉一息立斃草土臣欲留視橐餽則臣父原野暴骨長飽烏鳶臣餘氣僵魂

死生無地伏望 皇上付臣法司代兄歸葬兄
得畢命首丘臣願填尸牢戶若臣兄罪必不赦
請勒限就繫伏前日妄言之辜并案臣今日妄
請之罪 天子覽其奏意惻然憐之未及發六
月登萊撫臣曾化龍覆奏姜氏一門忠孝請賜
優卹始得奉 明詔下所司核將以甲申九月
卜葬謂謙益舊待罪太史氏俾書其事嗚呼忠
臣孝子國家之元氣也忠義之氣昌則存叛逆
之氣昌則亡有國家者之大坊也天寶逆命之
臣以六等定罪達奚珣輩駢斬于獨柳樹集百

寮往觀之而宋南渡李綱議僭逆僞命宜倣肅
宗時定罪用重典當時不能從識者以謂至德
之中興建炎之不振其興亡實繇于此今國家
方全盛奴雜種小醜闖螳賊游魂中朝士大夫
回面屈膝委質賊庭者所在而有夫豈國無刀
鋸以至是與若姜公者身無一命之寄家無中
人之產徒手扞賊橫身死義家人婦子血肉糜
爛國家元氣旁薄結轡而勃發于姜氏之一門
非偶然也使國家之臣子胥如姜氏則忠臣孝
子接踵于世何至如靖康之時所謂在內惟李

若水在外惟霍安國使敷天率土痛北轅而憂左袵哉比歲奴三入畿輔一門殉難者高陽孫氏順義成氏與姜氏而爲三孫氏成氏之議卹當國者口噤目眙若避禁諱至今寢閣未下今姜氏之卹獨出宸斷然後知崇獎節義固聖明之所急而所司奉行者之罪也自今以往忠義之氣昌國家之元氣日固叛臣賊子當胥伏獨樹之誅而奴闖之懸首藁街也不遠矣余爲書其事以俟之且以諗於國史之傳忠義者崇禎申申三月記

韓蘄王墓碑記

宋蘄國韓忠武王世忠墓在吳縣靈巖山下豐碑巋然鼎鼎屈盤禮部尚書趙雄奉詔撰也宋史列傳援据雄碑其書楊國夫人人事則碑爲詳建炎之復辟也楊國及二子質苗傳軍防守甚嚴王略無顧念隆祐太后宣見楊國楊國詣傳詒曰太尉作如許事公來矣於太尉何如傳乃屈膝拜曰願奉兄嫂禮謹具鞍馬煩夫人好爲言是日入見隆祐宣問周悉執楊國手垂泣曰國家艱危至此太尉首來救駕速清巖陞楊國

奉詔馳出都城遇傳弟翊于途告之故翊色動
手自捋耳楊國覺翊意非善愈疾驅一日夜會
王于嘉禾史云朱勝非紹傳遣妻子慰撫世忠
而不及楊國云云略也傳正彥獻俘行宮楊國
自碩人超封國夫人制曰知略之優無愧前史
給內中俸以示報焉功臣妻給俸自楊國始史
稱隆祐召梁氏入封安國夫人俾迓世忠速其
勤王誤也黃天蕩之戰楊國在行間親執桴鼓
史云戰將十合梁夫人親執桴鼓金兵終不得
渡羅大經鶴林王露載兀朮鑿河遁去夫人奏

疏言世忠失機縱敵乞加罪責舉朝爲之動色而碑及史皆不載爲斬王諱也大經又云斬王之夫人京口娼也嘗五更入府伺候賀朔忽于廊柱下見一虎蹲臥鼻息齁齁然驚駭走出已而人至者衆復往視之乃一卒因蹴之起問其姓名密告其母邀至家具酒食資以金帛結爲夫婦碑云楊國家楚州織簿爲屋蓋楊國家本楚州寓京口也斬王鎮楚州披草萊立軍府故夫人亦織簿爲屋與士卒共力役也斬王起銀州積功轉進武副尉宣和二年調西師討方臘

部勇敢五十人隨王稟以往遇楊國于京口當
在此時王爲裨將非小卒也碑載王娶白氏秦
國夫人梁氏楊國夫人茆氏秦國夫人周氏斬
國夫人四妻皆啓國封蓋宋世待功臣彝典如
此楊國起家北里慷慨擇配識英雄韎韐之中
遂能定國難奏膚公豐碑青史於今爲烈豈不
偉哉辛巳長至日余與河東君泊舟京江指顧
金焦二山想見兀木窮蹙打話斬王夫人佩金
鳳瓶傳酒縱飲桴鼓之聲殷殷江流瀆沸中遂
賦詩云餘香墜粉英雄氣剩水殘山俛仰間相

與感梁歎息久之甲申二月觀梅鄧尉還過靈
巖山下埽積葉剔蒼蘚肅拜酌酒而去因據採
楊國遺事記其本末如此

牧齋初學集卷第四十四

牧齋初學集卷第四十五

記五

耦耕堂記

萬曆丁巳之夏予有幽憂之疾負疴拂水山居
孟陽從嘉定來流連旬月山翠濕衣泉流聒枕
相與顧而樂之遂有棲隱之約以何孟陽有長
治之役卒卒別去予遂羈縻世罔跋前疐後爲
山中之逋客者十有餘年矣天啓中予遭鉤黨
之禍除名南還塗中爲詩曰耦耕舊與高人約
帶月相看竝荷鋤蓋追思疇昔之約而悔其踐

之不蚤也世故推移人事牽輓匹夫硜硜之節不能自固咎譽錯互構扇旁午殘生眇然不絕如縷然自此得以息機摧撞長爲山中之人而孟陽不我遐棄惠顧宿諾移家相就予深幸夫迷塗之未遠而隱居之不孤也請於孟陽以耦耕名其堂孟陽笑而許之嗟夫子與孟陽遭逢聖世爲太平之幸人其所爲耦耕者蓋亦感閭居之多暇喜一飽之有時庶幾息勞生而稅塵鞅豈與夫沮溺者流輟耕太息於蔡葉之間歎滔滔以沒世羣鳥獸而不返者哉余與孟陽之

似沮溺其耦俱之跡而已而其樂則固有過之者矣然亦有不能無慨然者予之得交於孟陽也實以長蘅長蘅與予偕上公車嘗歎息謂予吾兩人才力識趣不同其好友朋而嗜讀書則一也他日世事羸了築室山中衣食并給文史互貯招延通人高士如孟陽輩流髣髴淵明南邨之詩相與詠歌皇虞讀書終老是不可以樂而忘死乎予曰善哉信若子之言予願爲都養給掃除之役請以斯言爲息壤矣荏苒二十餘年長安邸舍酒闌燈炮之語猶歷歷在耳而長

衡已不可作矣人生歲月真不可把翫山林朋
友之樂造物不輕予人殆有甚於榮名利祿也
予之得從孟陽於此堂也可不謂厚幸哉莆田
宋比玉子三人之友也爲作八分書以扁於堂
而予記其語於壁閒世之君子過而攬焉其亦
有如予之慨然者乎崇禎三年錢謙益記

朝陽榭記

耦耕堂東南之第地瓦礫叢積登之有異焉因
而爲臺狀如敦丘起屋半閒以障風雨於是屋
之爲拂水石之爲三脊峯之爲石門石城合沓

攢簇於尋丈之內灌木族叢仰承厯屢紛紅駭
綠蔽虧變換榭踞山之東旦卽見日名之曰朝
陽取爾雅釋山之云也梁簡文帝招真治碑曰
高巖鬱起帶青雲而作峯拂水縣流灑天河而
俱會又曰其峯則有石門石城虛峴自然神功
挺起今斯榭之所直者高巖縣流樵夫牧人皆
能指示其處至所謂石門石城者流俗皆莫知
漫舉北山一二拳石以當之耳予按姑蘇志云
過吳王廟五六里有試劒石又有三沓石與石
城石門諸峯錯峙乃知三沓石之東試劒石下

石壁呀然中開俗謂之劒門卽石門也石之西
其厓如防如削巨石錯列如雉堞樓櫓卽石城
也簡文云虛峴挺起信不誣也舊志稱二峯在
頂山西北蓋未可信又云石城吳王置美人處
据漢書注及郡國志卽吳縣之靈巖山無容在
虞山也予爲記於壁閒庶游斯榭者可以舉目
而得之且使讀者知古人模狀山水其言語簡
妙爲不可及也崇禎四年二月二十五日記

秋水閣記

閣於山與湖之間山圍如屏湖繞如帶山與湖

交相襲也虞山墮山也蜿蜒西屬至是則如密如防環拱而不忍去西湖連延數里繚如周墻湖之爲陂爲澮者彌望如江流山與湖之形經斯地也若胥變焉閣屹起平田之中無垣屋之蔽無藩籬之限背負雲氣冒盪煙水陰陽晦明開歛變怪皆不得遁其豪末閣旣成主人與客登而樂之謀所以名其閣者主人復於客曰客亦知河伯之自多於水乎今吾與子亦猶是也嘗試與子直前楹而望陽山箭缺累如重甌吳王拜郊之臺已爲黍離荆棘矣邈迤而西江上

諸山參錯如眉黛吳海國康蘄國之壁壘亦已
蕩爲江流矣下上千年英雄戰爭割據杳然
不可以復跡而況於斯閣歟又況於吾與子以
眇然之軀寄於斯閣者歟吾與子登斯閣也欣
然騁望舉酒相屬已不免啞然自笑而何怪於
人世之還而相笑與客曰不然於天地之中有
山與湖於山與湖之中有斯閣於斯閣之中有
吾與子吾與子相與晞朝陽而浴夕月釣清流
而弋高風其視人世之區區以井甃相跨峙而
以腐鼠相嚇也爲何如哉吾聞之萬物莫不然

莫不非因其所非而非之是以小河伯而大海
若少仲尼而輕伯夷因其所然而然之則夫變
蛭之相憐儻魚之出遊皆動乎天機而無所待
也吾與子之相樂也人世之相笑也皆彼是之
兩行也而又何閒焉主人曰善哉吾不能辯也
姑以秋水名閣而書之以爲記崇禎四年三月
初五日

明發堂記

斥山居以爲墓鄉之爲堂爲閣游焉息焉者皆
墓域也直秋水閣之後竹樹掩曖礪石錯列宮

之以爲墓田丙舍其中爲堂前榮後寢高明而
靚深倣越溪張氏之製命工圖以來有以栢屋
售者度而移焉不爽尺寸名之曰明發於以登
牢蔬饌親賓示吾子孫毋忘其初也庭中有老
梅修竹浮水溜渠空翠自墮清陰不改堂之東
步檐周流迴廊交屬其前楹近臨墓道游人士
女竝肩接踵薄而觀之如坐鏡中紛紅拖碧如
雜圖畫折而東拂水之磴繞墓前穴墻而出以
注於簷下雨過泉雍水石鬬擊蛇龍攫拏風雷
喧豗潰而西傾折回直舒爲漫流聞東崖旋潰

沸土瀑淥然而下經第五橋以入於明堂之水
梁簡文所謂拂水縣流天河俱會者循行吾欄
檻之間猶硯池帶水也礪之狀流又折而北匯
於堂之西石壁之下有泉湛然所謂歸來泉也
泉之下洄池蓄停礪石平布其西築室方丈幽
蔭蒼蔚翠蔓蒙絡日車蒼涼月輪穿漏此吾堂
之別館也堂之東北隅有樓以燕處有陰室以
違夏有陽室以違冬庑庖湑順序以爲此吾
所以翼夫堂也予之營斯堂也財一年而有急
徵之禍繫踰年而歸歸而廬於此也歲時伏臘

晨昏肅拜顧明發有懷之義未嘗不優然如有
見愴然如有聞也霜淒月黑風雨如晦白楊蕭
騷山谷震駭念古之孝子遶墳而啼攀栢而泣
未嘗不膚粟骨驚魄而所死也良夜開卷閱房
點筆追思壯年昔游春燈秋卷未嘗不撫駒策
驥歎老至而悲無聞也雒中之冠帶汝南之車
騎蜀郡之好事鄆杜之諸生聞聲造門希風狂
駕屨舄交錯舟舩填咽邑屋聞其無人空山爲
之成市畏虛名之難居知物望之不易副未嘗
不逖然以思默然以慙而悄然以恐也歲月荏

蔣世務牽絰廬三年而復返僂仰感歎輒爲之
記詩不云乎無念爾祖聿修厥德吾子孫念之
哉若夫遊觀之美山林鳥魚之樂非吾所以名
堂之意也其敢以示子孫乎廬居後之三年涂
月二十八日謙益謹記

花信樓記

於墓道之東偏擇爽塏之地撤耦耕堂而徙焉
招孟陽也堂之前隙地與秋水閣相直庀山居
之餘材爲樓五間後山如屏前湖如鏡堤池折
旋景物攢簇名之曰花信而劉狀元胤平書其

額拂水游觀之盛莫如花時祝釐之翁媼踏青之士女連袂接袪摩肩促步循月堤穿水閣笑呼喧闐游塵合沓呵之不能止避之不勝趨也作斯樓也而美其名幾以飽其觀聽誘而奪之樓旣成堤之西東閣道相望不能中分游者而來者滋益衆客或甚余誘而奪之之法不已窮乎予曰予之名樓也以花信而游人之追奔走集者爲花來也當此之時風柔日麗春山如粧春湖如鏡弱柳縹煙天桃暈雨相與握蘭贈藥思吟怨歌靚觀微步傍徨徙倚非有以誘之誰

得而奪之迨乎向春之末迎夏之陽鷓鴣啾啾
羣女出桑游者息觀者止紅綻綠肥草長麥秀
於斯時也誰誘之而誰奪之耶吾與子倚飛閣
臨長堤身游於嬌花寵柳餘香殢粉之中欣欣
然如有得也已而時序遷改繁華代謝譬之雨
止雲收酒闌人散未嘗不湔然如有所失也造
物者之於吾與子也其誘且奪之則已久矣而
子猶未之寤歟客曰藏舟於山夜半有力者負
之而趨昧者不知也姑記其語於壁花時登斯
樓也更與子飲酒

留仙館記

得周氏之廢圃於北郭古木藂石鬱蒼蒼蔚其
西偏有陋室焉爲之易腐柱傾加以塗墍樹綠
沈几山翠濕牖煙霞澄鮮雲物靚深過者咸歎
賞以爲靈區別館也樹之眉曰留仙之館客視
而歎曰虞山故仙山也斯館也西望乾元宮徐
神翁之雪井在焉迤而南爲招真治梁蘭文所
銘二始入會者也折而北爲烏目山淳于斟遇
慧車子授虹景經處也子將隱矣有意於登真
度世名其館爲留仙不亦可乎予曰不然予之

名館者慈谿馮氏爾賡號留仙者也予取友於天下多矣晚而得留仙兄弟留仙之於我古所謂王貢嵇呂無以尚也予既老於一丘而留仙爲天子之勞臣枝柱於津門渝水之間逃而思思而不得見眉之館焉所以識也客曰是矣則胡不書其姓繫其官而以別號名館使人疑於望仙迎仙之屬歟予笑曰子必以洪崖赤松餐六氣而飲沆瀣者而後爲仙歟吾之所謂仙者有異焉老子吾夫子之所學焉者也一則曰吾聞諸老聃再則曰吾聞諸老聃禮經之所載

也許叔遜龍沙之祖也淨明忠孝其教法在也
以真誥考之忠臣孝子歷數千百年猶在金房
玉室之間迄於今不死也以留仙之館比於望
仙迎仙何不可哉士君子出而致身遂志分主
憂振國恤其爲修煉也視山澤之癯鵲息禽戲
塊然獨存者所得孰多吾嘗從樵陽之侶窺石
函之閱籍得廁名其閒者吾黨蓋有人焉未可
謂神仙去人遠也客曰善哉請書之以爲記俟
其他日功成身退爲五湖三峯之游宴坐於斯
館相與縱飲舒嘯而以斯文示之崇禎壬午小

歲日記

玉繁軒記

河東君評花最愛山礬以爲梅花苦寒蘭花傷
豔山礬清而不寒香而不豔有淑姬靜女之風
蠟梅茉莉皆不中作侍婢予深賞其言今年得
兩株於廢圃老墻之下荆奧草除瓦礫披而出
之皆百歲物也老幹攫挐樛枝扶疎如衣從風
如袖拂地又如人桔拳乍脫相扶而立相視而
笑君顧而樂之爲屋三楹啓北牖以承之而請
名於予予名之曰玉繁而爲之記曰瑤花之更

名山礬始於黃魯直以瑤花爲唐昌之玉紫者
段謙叔曾端伯洪景廬也其辨證而以爲非者
周子充也夫瑤花之卽玉紫耶非耶誠無可援
据以唐人之詩觀之則劉夢得之雪紫瓊絲王
仲初之瓏鬆玉刻非此花誠不足以當之有其
實而欲奪其名乎物珍於希忽於近在江南則
爲山礬爲米囊野人牧豎夷爲樵蘇在長安則
爲玉紫神女爲之下九天停颺輪攀折而後去
固其所也以爲玉紫不生凡地惟唐昌及集賢
翰林有之則陋又以爲玉紫之種江南惟招隱

有之然則子充非重玉縈也重李文饒之玉縈耳玉樹青葱長卿之賦也瓊樹壁月江總之辭也子充又何以云乎抑將訪其種於宮中窮其根於天上乎吾故斷取玉縈以勝斯軒春時花放攀枝弄雪游詠其中當互爲詩以記之訂山礬之名爲玉縈而無復比場更礬之譏也則自予與君始崇禎十五年十二月二十九日牧翁記

匪齋記

易比之六三曰比之匪人世儒之解曰匪人猶

曰小人也易言君子小人多矣於泰曰內君子而外小人於否曰內小人而外君子遯則曰吉曰否解則曰有解曰退革則曰豹變曰革面師之上六既濟之九三曰小人勿用同人之九三曰小人弗克皆鑿鑿乎指小人而質言之也於比何獨不然比之卦以九五居陽爲主而五陰皆求比焉比而不以元永貞則凶邪之道永貞而不遇其主則猶未免於咎也初六之有孚盈缶永貞而遇其主故曰无咎終來有它拔茅彙征不遐遺朋亡泰之道也故曰吉六二之自內

內而得君六四之外比外而得賢故皆曰貞吉
六三近者皆陰而遠無應所與比者皆非其人
中懷永貞蘊初六之盈缶而不遇其主者也莫
益之或擊之莫之與則傷之者至矣象曰不亦
傷乎夫子蓋傷之也水流濕火就燥比之相從
各以其類漢之有李固胡廣趙戒之匪人也唐
之有陸贄裴延齡趙憬之匪人也易不言君子
小人而曰匪人虛其位以俟人主之決擇也不
言凶不言咎而言傷者何也有九五剛中之主
顯比於上五陰之求比者用三驅之道以縱舍

之雖違有孚之吉而終免後夫之凶則亦止於
傷而已矣崇禎元年予以閣訟奉明旨鐫責
曰中有匪人上方向學精於詩書取原筮之
辭以斷枚卜之獄不斥言小人而曰匪人使臣
子雖退廢其名猶可居也震怒之後事得白卽
放歸王用三驅失前禽之義也聖主之放其
臣也有哀矜無忿疾傷之之道也客有唁予者
曰蹇之六二曰王臣蹇蹇匪躬之故安知上不
以蹇之匪躬勗子乎予曰是何敢哉請以爲
上之明旨名其讀書之齋曰匪而繹其說以爲

記

牧齋初學集卷第四十五

牧齋初學集卷第四十六

記六

游黃山記序

辛巳春余與程孟陽訂黃山之游約以梅花時相尋于武林之西溪踰月而不至余遂有事于白嶽黃山之興少闌矣徐維翰書來勸駕讀之兩腋欲舉遂挾吳去塵以行吳長孺爲戒車馬庀糗脯子舍去非羣從相向慙慙而皆不能從也維翰之書曰白嶽奇峭猶畫家小景耳巉崎幽石盡爲惡俗黃冠所塗點黃山奇峰拔地高

者幾千文庫亦數百文上無所附足無所逸石
色蒼潤玲瓏天曲每有一罅輒有一松逕之短
鬚老骨千百其狀俱以石爲土歷東南二嶽北
至吟哈以外南至落迦匡廬九華都不足伯仲
大約口摹決不能盡懸想決不能及雖廢時日
頗跋涉終不可不到也是游也得詩二十餘首
寒窻無事補作記九篇已而悔曰維翰之言盡
矣又多乎哉余之援筆爲此編也客聞之索觀
者相屬余不能拒遂撰次爲一卷先詒孟陽于
長翰山中而略舉維翰之書以發其端壬午孟

陬虞山老民錢謙益序

記之一

黃山聳秀峻極作鎮一方江南諸山天台天目
爲最以地形準之黃山之趾與二山齊淞東西
宣歙池饒江信諸郡之山皆黃山之枝隴也其
水東南流入于歙北入于宣南入于杭于睦于
衢自衢西入于饒西北入于貴池其峰曰天都
天所都也亦曰三天子都東南西北皆有郭數
千里內之山扈者歸者岌者峘者嶧者蜀者皆
黃山之負屨几格也古之建都者規方千里以

爲甸服必有大川巨浸以流其惡黃山之水奔注交屬分流于諸郡者皆自湯泉而出其爲流惡也亦遠矣謂之天都也不亦宜乎余以二月初五日發商山初七日抵湯院自商山至郡七十里自郡至山口一百二十里至湯院又八里其所逕寺曰楊千臺曰容成潭曰長潭嶺曰石碓石曰薌石溪曰芳溪村曰芳村其地勢坡陀犖确擁厓據壁溪流縈折湑岸相錯其人家衣美箭被芳草略約拒門疎籬阻水褰裳濟涉半在煙嵐雲氣中絲長潭而山口山率環谷水率

注溪谷窮復入一谷山與谷如堂如防旋相宮
又相別也溪水清激如矢或瀆沸如輪文石錯
落深淺見底百里之內天容沉寥雲物鮮華游
塵飛埃望厓却反人世腥腐穢濁之氣無從至
焉余語同游者曰子知黃山乎是天中之都會
而軒轅之洞府也二百里內皆離宮閣道羣真
之所往來百神之所至止殆有神物司啓閉給
糞除于此地而人未之見也吾嘗游岱矣未及
登天門上日觀不知岱之尊也今吾之至于斯
也肅然而清悄然而恐恍然如在天都石門之

上余之茲游也而豈徒哉是日浴于湯池宿藥谷之桃源菴

記之二

自山口至湯口山之麓也登山之逕於是始湯泉之流自紫石峰六百仞縣布其下有香泉溪泉口瀆沸蒸熱冷泉下注涼溫齊和瀆尾涌出穢濁迸去初浴汗蒸蒸溢毛孔已而愜然霍然如醒斯析如店斯解拍浮久之悅然感素女玉真之事作畱題四絕句浴罷風于亭中屨衣袂飄飄然皆塵外物也折而西竹樹交加崖石撐

柱蒙籠暴壑如無人逕行半里許余氏桃源菴
在焉菴之前天都青鸞鉢孟諸峰回合如屏障
其左則白龍潭水膏渟黛蓄噴薄巨石水聲砰
磅微雨霖霖辛夷炤簷皎如玉雪俄聞籬落閒
剝啄海陽邵梁卿幼青自白岳來訪足音蹙然
足樂也午夜聞衝撞彌急溪聲雨聲澎湃錯互
晨起坐小樓視天都峰瀑布痕爛斑駁駁俄而
雨大至風水發作天地掀簸漫山皆白龍掉頭
掉尾橫拖倒拔白龍潭水鼓怒觸搏林木轟磕
几席震掉雨止泉益怒呀呷撞胸如杵在曰日

下春少閒乃相與商游事焉余氏菴傍湯池朝夕浴于斯飲于斯汲于斯以斯池爲湯沐焉服食焉皆可也昔人飲菊潭而強飲杞水而壽況丹砂之泉軒轅浴之三日而伐皮易毛者乎以千金賃藥谷之廬以二千金庀糗糧治藥物沐飲于斯泉者數年登真度世可執券而取也今有進賢冠于此曰賣之三千金人爭攘臂而求之以三千金買一仙人則掉頭不顧此可爲一笑者也

記之三

繇祥符寺度石橋而北踰慈光寺行數里逕硃砂菴而上其東曰紫石峰三十六峰之第四峰與青鸞天都皆嶧山也過此取道鉢盂老人兩峰之間峰趾相竝兩崖合沓彌望削成不見罅縫捫壁而往呀然洞開軒豁呈露如闢門闔登山者蓋發軔于此里許憩觀音崖崖欹立如側蓋逕老人峰立石如老人偃僂縣厓多奇松裂石迸出糾枝覆蓋白雲蓬蓬冒松起僧曰雲將鋪海盍少待諸遂憩於面峰之亭登山極望山河大地皆海也天將雨則雲族而聚于山將晴

則雲解而歸于山山河大地其聚其歸皆所謂鋪
海也雲初起如冒絮盤旋老人腰臂閒俄而滅
頂及足却迎凌亂迫遽迴合瀰漫匝匝海亦雲
也雲亦海也穿漏盪摩如百千樓閣如奔馬如
風檣奔踊卻會不可名狀盪胸撲面身在層雲
中亦一老人峰也久之雲氣解駁如浪文水勢
絡繹四散又如歸師班馬倏忽崩潰窅然不可
復跡矣回望老人峰偃僂如故若遲而肅客者
緣天都趾而西至文殊院宿焉黃山自觀音厓
而上老木措徑壽藤冒石青竹綠莎蒙絡搖綴

日景乍穿飛泉忽灑陰沉宵窅非復人世山未
及上曰翠微其此之謂乎升老人峰天宇恢廓
雲物在下三十六峰叅錯涌現恍恍然又度一
世矣吾至此而後乃知黃山也

記之四

憇桃源菴指天都爲諸峰之中峰山形絡繹未
有以殊異也雲生峰腰層疊如褐衣焉雲氣蒼
翳峰各離立天都乃巋然于諸峰矣竝老人峰
浴礪上皆緣天都之趾援危松攀罅壁或折而
陞或縣而度旋觀天都如冕而垂如介而立眎

向之所見尊嚴有加焉下嶺復上僧方鑿石斧鑿之痕與趾相錯也石壁斷裂人從石罅中上歷罅里許天都遂罅而走甫蹬目而踵已失也甫曳踵而目又失也壁絕石復上合乃梯而下人之下如汲井身則其綆也汲既深綆穴地而出又從井榦中上也折而陟臺是爲文殊院普門安公所荒度也院負疊嶂峰左象右獅二羅松如羽蓋面擁石如覆袈裟其上有趺跡其下下絕桃花峰居趺石之足桃花之湯出焉其東則天都峰如旒倒垂其西則蓮華峰獻萼焉其

西面曠如也指點凝望浮煙矗靄青蔥紺碧穿
漏于夕陽平楚之間已而煙凝靄積四望如一
暮景夕嵐無往而非雲海向所沾沾于老人峰
者又存乎見少矣生臺有二鴉翔集僧言此神
鴉也明日當爲公先導與之食祝而遣之寢室
不滿一弓夜氣肅冽與老僧推戶而起三十六
峰微茫浸月魄中零露灑灑露溼巾屨悽神寒
骨峭愴而返余故好山栖野宿以此方之其猶
在曲屋突夏砥室羅幃之中乎余之山居而宿
焉者自茲夕始也

記之五

清曉出文殊院神鴉背行而先炤微幻空兩僧
從焉避蓮華溝險從支逕右折險益甚炤微肘
掖余臂幻空踵受余趾三人者鑿與駟蛩若也
行三里許憩炤微茆菴菴背蓮花面天都負山
厓屢蔽虧雲漢俯視洞壑日車在下陰茆簷藉
白石出孟陽畫扇傳觀惜不與偕杖屨也二僧
踞盤石疏記所宜游者曰繇喝石居三里至一
線天再折一里許下百步雲梯又一里上大悲
頂出新闢小徑三里許達天海飯訖東北行上

平天砭五里上石筍砭轉始信峯經散花塢看
擾龍松過師子林上光明頂復歸天海少憇登
煉丹臺而還日未亭午天氣如清秋此游天所
相也食時飯天海神鴉却而迎焉次第游歷如
二僧之云日夕鴉去迴翔如顧別乃返天海宿
焉一線天石壁峭陁水旁激如雨疾趨過之傳
曰巖岑之下古人之所避風雨謂此也雲梯當
蓮華峰之趾磴道歷七百級磴陁而級長踵曳
如絙脰垂如汲下上攀援後趾須前趾前踵蹠
後踵旁瞰股栗作氣而後下乃相慶脫于險也

始信峰于三十六峰不中爲兒孫一部婁耳而頗踞諸峰之勝繇師子林東折兩厓陟立相去丈許北厓裂罅處一松被南厓援之以度陟其巔茆菴欹傾積雪楮柱俯視雲氣諸峰矗出其最奇石筍砦也圖經云黃帝浮丘公上昇之後雙石筍化成峰可高千丈今石筍攢立不啻千百嵌空突起拔地挿天鈎連坼裂譎詭化質亦不可以丈計豈造物者役使鬼神破碎虛空穿大地爲苑囿鑿混沌之肺腑以有此也起視大壑却立萬仞指點宣州池陽堆皺蹙摺纒如困

廩馮高臨下如限堵墻堆阜虛落人語殷殷過此則翠微松谷黃山西北之境盡矣煉丹臺之前拱立相向者煉丹峰也翠微飛來諸峰各負勢不相下胥俛爲環衛崩壓倚傾櫛比幕布若削劒戟若樹儲胥軒轅相宅之地故有神物護訶妄人不察設版築室宜其蕩剛風而焚劫火不終朝而輒毀也三十六峰側影旁軼敷花如菡萏丹臺藏貯其中如的中之薏臺方廣可置萬人三面剗削前臨無地却行偃臥足踣踣不能舉目眴眩者久之余之登茲山也自湯寺而

上披蒙茸歷幽仄蓋奧如也自文殊院而上指
削成遡雲漢蓋曠如也及遵石筍丹臺觀夕陽
望光景意迷精爽默自循省靈區異境顯顯心
目安知俛仰之間不將一瞬遷改夜半有負之
而趨者與安知吾身在此而市朝陵谷堆塵聚
塊者不已窅然若喪與又安知吾所坐之處所
游之地非幻化爲之如所謂五山之根無所連
著者而吾亦將馮空而殞虛與余肉人也載朽
腐之軀以游乎清都紫微余心蕩焉夫安得不
執化人之祛懂而求還也與楚莊王曰子具于

強臺南望料山以臨方皇左江右淮其樂忘死
恐畱之而不能反吾之於此山所以游焉而樂
樂焉而不敢以久畱也

記之六

晨起風蓬蓬然取道雲梯面風逆上負風而仆
仆而起兩腋若有人相扶不知其爲風力也盡
雲梯則爲蓮華峰之趾徑如荷蕖行迴藏峰腹
中磴窮穿峰腹而出如緣荷本上重臺也風愈
厲逆曳不得上乃據石趺坐以俟登陟者巡途
而下欲前復却一松一石低迴如故人僧曰三

十六峰處處惜別盍早至慈光寺招邀諸峰與
執手欄楯閒乎寺踞天都之隴枕桃花蓮華二
峰左則硃砂青鸞紫石右則疊嶂雲門竝外翼
焉普門安公者縛禪清涼山中定中見黃山遂
繇清涼徙焉比入都門願力冥感慈聖皇太
后頒內帑爲薙髮賜紫衣幡杖神宗賜寺額
曰慈光降敕護持今寺尊奉藏經慈聖所欽
賜裝池也四面金像像七層層四尊凡二十有
八層有蓮花坐坐有七準提居葉中一葉一佛
佛不啻萬計慈聖及兩宮所施造也普門將

構四面殿手削木爲式四阿四嚮不失毫髮今
藏弄焉普門隻手開山熾然建立當其時 兩
宮之慈恩加被四海之物力充牣移兜率于人
閒化榛莽爲佛土何其盛也軍興日煩饑饉洊
至鍾魚寥落糠覈不繼追鼓鐘于長信數伽藍
于雒陽蓋不勝滄海劫灰之嘆焉斯李文叔之
所以致慨于名園也普門塔在寺後白石鑿鑿
桃花流水圍繞塔前人世牛眠馬鬣起冢象祁
連者方斯蔑如亦可感也是夕再浴湯池宿桃
源菴山僧相送不忍舍鄭重而別寄語天都蓮

花諸峰如吳人語念相聞也元人汪澤民曰宿
湯寺聞啼禽聲若歌若答節奏疾徐名山樂鳥
下山咸無有余方有南浦之別聞之悽然感余
心焉既與黃山別遂窮日之力以歸

記之七

余之登山也浴湯池憩桃源菴夜半大雨坐白
龍潭小樓看天都峰瀑布雨止登山雲氣猶滃
鬱登老人峰看鋪海山行三日天宇軒豁如高
秋蕭辰一望千里每春夏登山煙嵐偪塞不辨
尋丈山僧嘆詫得未曾有甫出山雨復大作淋

離霑溼同游者更相慶也客曰黃山之游樂乎
余應之曰樂則樂矣游則未也三十六峰之最
著者莫如天都蓮花出芳村則蓮花峰離立抵
白龍潭則天都正中如屏陟慈光寺踞天都而
枕蓮花離而又屬顧若宿留憇文殊院天都東
拱若幡幢之建立蓮花右翊若瓣花之披敷兩
峰之面目畢見矣自茲以往偁背易嚮步武換
形如鏡中取影橫見倒出非坐臥俯仰不能髣
髴而茲遊未遑也昔人言採藥者裹三日糧達
天都頂萬曆閒普門閣菴相繼登陟石塔旛燈

儼然在焉夫獨非腐肉朽骨而遂如天之不可
升耶石門爲黟山之中峰歙郡黃山樓北瞰此
峰峰勢中圻若巨門唐人有詩曰閒倚朱欄西
北望只宜名作石門樓則石門之高峻唐時郡
樓見之而游人無復過問卽山僧亦莫知所在
此可以名游耶游茲山者必當裹餽糧曳芒屨
經年累月與山僧樵翁爲伴侶庶可以攬山川
之性情窮峰巒之形勝然而霞城乳竇紫床碧
枕毛人之所飲阮公之所歌未可以津逮也桃
花如扇松花如纛竹葉如笠蓮葉如舟非鍊形

度世之人未易邁也三十六峰之巔樵蘇絕跡
猿鳥慄慄唯乘飈輪駕雲車可以至焉列子言
海外五山所居之人皆仙聖之種一日一夕飛
相往來者不可數吾安知仙聖之人不往來于
三十六峰之間如東阡北陌乎吾將買山桃源
朝夕浴于湯池鍊形度世然後復理游屐焉山
靈其許我哉

記之八

山之奇以泉以雲以松水之奇莫奇于白龍潭
泉之奇莫奇于湯泉皆在山麓桃源溪水流入

湯泉乳水源白雲溪東流入桃花溪二十四溪
皆流注山足山空中水實其腹水之激射奔注
皆自腹以下故山下有泉而山上無泉也山極
高則雷雨在下雲之聚而出旅而歸皆在腰膂
閒每見天都諸峰雲生如帶不能至其冢久之
滃然四合雲氣蔽翳其下而峰頂故在雲外也
鋪海之雲彌望如海忽焉迸散如鳬驚兔逝山
高出雲外天宇曠然雲無所附麗故也湯寺以
上山皆直松名材檜榷梗楠藤絡莎被幽蔭蒼
蔚陟老人峰懸崖多異松負石絕出過此以往

無樹非松無松不奇有幹大如脰而根蟠屈以
畝計者有根只尋丈而枝扶疎蔽道旁者有循
厓度壑因依如懸度者有穿罅穴縫崩迸如側
生者有幢幢如羽葆者有矯矯如蛟龍者有臥
而起起而復臥者有橫而斷斷而復橫者文殊
院之左雲梯之背山形下絕皆有松踞之倚傾
還會與人俛仰此尤奇也始信峰之北厓一松
被南厓援其枝以度俗所謂接引松也其西巨
石屏立一松高三尺許廣一畝曲幹撐石厓而
出自上穿下石爲中裂糾結攫拏所謂擾龍松

也石筍矸鍊丹臺峰石特出離立無支隴無贅阜一石一松如首之有笄如車之有蓋參差入雲遙望如薺奇矣詭矣不可以名言矣松無土以石爲土其身與皮幹皆石也滋雲雨殺霜雪句喬元氣甲拆太古殆亦金膏水碧上藥靈草之屬非凡草木也顧欲斫而取之作盆盎近玩不亦陋乎度雲梯而東有長松夭矯雷劈之仆地橫亘數十丈鱗鬣偃蹇怒張過者惜之余笑曰此造物者爲此戲劇逆而折之使之更百千年不知如何槎枒輪囷蔚爲奇觀也吳人賣花

者棟梅之老枝屈折之約結之獻春則爲瓶花之尤異者以相夸焉茲松也其亦造物之折枝也與千年而後必有徵吾言而一笑者

記之九

黟山三十六峰詳載圖經學士大夫不能悉其名而山僧牧子不能指其處所知者天都蓮花煉丹硃砂十餘峰而已石人峰譌爲老人雲門峰譌爲剪刀疊嶂峰譌爲勝蓮又有以培塿而冒峰名者始信峰也李太白有詩送溫處士歸黃山白鵞峰今不在三十六峰之列蓋三十六

峰皆高七百仞以上其外諸峰高二三百仞者
不與焉白鷺峰或亦諸峰之一也自普門安公
乘宿夢因緣闢文殊院命老人峰背一嶺曰三
觀嶺於是命名者紛如曰光明頂曰天海曰師
子林皆傳會文殊院而名也普門開山之後徽
人以黃山媚客輶車輜軒至止相望所至輒樹
眉顏額磨厓題名青峰白石有剝膚黥面之憂
三十六峰亦將不能保其故吾矣山之巔曰海
子繇平天砭循鍊丹峰里許名曰海門光明頂
爲前海師子林爲後海修廣可數里如以茲山

峻絕目其平行處爲海則華山之頂高崑四合
重嶺秀起不名之曰華海如以雲生之候彌望
雲浪目之曰海則泰山之雲觸石而出膚寸而
合不名之曰岱海以海名山以黃名海紕繆不
典當一切鐫削爲山靈一洗之也自山海經水
經紀三天子鄩亦曰三天子都地志家紛紛聚
訟有疏通之者曰率山爲首黠山爲脊大鄩爲
尻似矣新安老生吳時憲曰黃山有最高峰曰
三天子都東西南北皆有鄩婺有三天子鄩南
鄩也匡廬亦稱三天子鄩西鄩也績溪有大鄩

東北鄣也天都爲天子都率山匡廬大鄣爲天子都之鄣此伯益桑欽之疏義而黟山之掌故也時憲振奇人也所居環堵巢書其中見溪南富人則唾面去之余遊新安新安人無能舉其姓名者矣故余作黃山記以時憲之言終焉